

左文襄公全集

左文襄公奏稿卷九

起同治三年甲子四月訖六月

目錄

進規湖郡截剿上游竄賊連獲大勝摺

逆賊分竄江西請 敕楊岳斌督辦江皖軍務片

延平軍情喫緊調員助剿片

浙省被災郡縣同治三年應徵錢糧請分別徵蠲摺

籌修海塘土塘片

進規湖郡攻克要隘疊勝一挫摺

追剿江皖竄賊疊勝見籌派兵馳援江西摺

浙軍擊賊弋陽獲勝片

委員護送前任杭州將軍家屬回旂片

輪船巡洋獲盜酌保人員摺

擒斬黃巖巨匪管繼湧片

勦賊疊勝粵逆林彩新一股悉數殲除摺

浙省餉項支絀請照常收捐摺

浙海關常稅缺額銀兩請就洋稅撥補摺

陳明審辦謀劫戕官之兇犯立即正法摺

遵保定海兵團在洋捕盜出力官紳片

進規湖郡疊勝并攻克孝豐縣城生擒首逆摺

附陳閩邊軍情片

援江各軍近日軍情片

查明浙省失事應辦各員分別定擬摺

揀員請補道員片

覈減甯波府屬浮收錢糧摺

浙紹金衢等屬水災分別履勘安撫片

請將奏調之知府畱浙陞補片

查明失察會匪釀變之員弁從重擬結摺

江省減成米捐已飭停撤片

進規湖郡截剿上游竄賊連獲大勝摺

同治三年四月十三日

奏爲官軍進規湖郡并截剿上游竄賊連獲大勝見籌剿辦情形
恭摺馳奏仰祈

聖鑒事竊湖郡踞逆經官軍疊次擊敗後仍於菱湖東林山道場
山妙喜鎮和平鎮等處分築堅壘希圖抗拒并時出零賊由埭頭
鎮之西以繞高連陞各軍後路臣以高連陞王月亮等兵力尙單
當飭蔣益澧分撥鄧光明各營進駐洛舍埭頭鎮一帶爲高連陞
各軍援應并飭洋將德克碑花勇馳赴湖州助剿飭張景渠劉樹
元等軍仍紮舊館蔡元吉一軍仍紮靈山以掣賊勢三月二十五
日湖郡首逆偽祐王李遠繼率悍黨水陸數萬由菁山下施村等

處直犯埭頭鎮高連陞王月亮營壘勢極兇猛高連陞王月亮督各營擊之見賊勢前疏後密知其設伏誘我整隊齊進賊退則故卻以誘之賊進則奮躍以迎之鏖戰竟日斃悍賊數百名晚間該逆復列炬齊隊來撲呼聲震地火光燭天高連陞等飭各軍堅壁勿出潛派槍礮隊蹲伏壘旁由暗擊明俟賊撲近排轟之至亥刻賊始敗竄官軍逐之逆賊自相蹂藉比曉周視牆外重濠則賊屍已滿矣據生擒賊供是戰賊設伏待我苦持一日詭計不行因以重利啗諸賊欲乘我疲而迄不得逞是日僞護駕列王劉德義等率賊萬餘由張村出將抄埭頭鎮高連陞營壘之後距武康縣城二十五里楊昌濬督羅大春兩營自武康縣城潛起截之遇賊雞

毛衛陣斬僞列王劉德義斃賊數百名羣賊駭遁賊經此挫敗其
膽始喪菁山茅山下施村和平鎮妙喜鎮各賊均向湖郡附城西
南一帶退去此進規湖郡血戰獲勝之實在情形也其竄徽之賊
經王開琳於三月十七日在歙南小川截剿獲勝後該逆遁回楊
村屯聚徽軍是日失利賊燄甚張黃少春王開琳因臣預飭兼顧
屯溪彼此函約合剿十九日各營由小川前進抵黃背村遇賊於
余岸敬興地方殪其先鋒賊數十是夜官軍卽營於余岸敬興一
帶二十日王開琳令總兵丁長勝副將莫坤和出左路踰小溪以
攻上楊村總兵喻勝榮參將康榮詔總兵銜副將羅瑞山出中路
黃少春所派總兵銜副將張福齋總兵楊芳桂副將周紹濂遊擊

劉昌選等出右路以攻下楊村王開琳率親兵并督參將熊常富中營隨後接應已正齊抵楊村羣賊蜂擁而出各營奮威衝殺立斃悍賊多名層壓層進銳不可當王開琳復自楊村山後繞出陣前立將上下楊村之賊埽除淨盡敗匪向篁墩鳧水而逃者溺斃頗多其向屯溪數里牛坑而逃者鮮有脫逸是日斃賊約三四人大小賊目約以百計生擒六七百名而屯溪倖獲保全追過屯溪鎮時張福齋等見有賊數百在休甯南界龍安一帶正覓路逃竄張福齋令哨長湯尤高湯復春持令傳呼拋棄軍械投誠免死賊目楊海芳張世松繆名盛等率其黨七百餘人伏地乞降張福齋勒馬受之詢知爲李世賢之黨右隊挑其壯健者二百餘名分

置各旂餘給護票川資釋令回籍收隊回營已三鼓矣是夜接遂安縣飛報有賊由白際嶺竄出前隊已抵小洞直趨馬金街黃少春先派赴馬金之黃元吉張介和等一營一旂見賊至卽於姚村築營伐木樹柵環之甫定而賊大至環馬金左右十數里皆賊館也是夜槍礮繞轟不歇黃元吉率勇固守於柵隙還礮轟之斃賊五十餘名官軍陣亡者亦二十餘名二十二日賊復更番猛撲一晝夜時米糧已缺子藥亦垂盡黃元吉張介和誓以死守士氣彌厲是日黃少春督同李耀南伍正德廖渭臣伍先申等馬步各營由淳安冒雨馳抵昏口途遇魏喻義約其同援馬金適王開琳所調之參將王福昌帶老湘右營亦至時大雨如注溪水暴漲乃擇

淺鳧水而過繞出霞山馬金之間賊悉銳來撲官軍分路擊之斃賊數百名重圍立解魏喻義所部從右路攻霞山賊巢銳進遇伏所部參將銜遊擊陳升倫花翎都司張禮宣劉開賢劉宗聖力戰陣亡右旂遊擊廖渭臣策馬馳援亦歿於陣弁勇之亡傷者蓋百餘名是夜賊於馬金街對河連築三壘黃少春乘其甫成挑勇丁三百名夤夜鳧水破之斃賊數百二十三日該逆悉銳來撲各營潛伏不動待其槍礮稍息分兩路抄擊斃賊數百名二十四日賊分起竄走一出星口一竄華埠二十五日猛撲副將戴奉聘呂永貴遊擊何秀清等華埠營盤適道員王德榜派副將蕭得龍都司李運龍道銜知府楊士樑遊擊鍾元興等由玉山馳來助剿議堅

壁以待是夜該逆大隊麇至圍撲戴奉聘三營百計環攻凡兩晝夜均經戴奉聘等鎮定卻之二十七日辰刻賊向西路竄走戴奉聘等躡蹤追擊斬殿後賊百餘名仍分路追之時臣前調防守分水之劉明珍等四營已抵衢州署衢州鎮總兵劉培元聞賊竄入江西玉山縣界立飭其由常山草坪關出勦二十八日劉明珍甫出屏風關卽與賊之前隊遇斃先鋒悍賊數十名賊卽敗退二十九日追至古城斃賊數百名生擒二百餘名內有僞朝將一名賊目三名逐北至玉山城河偏溺無算拔出難民數千時王德榜已於先日擊敗三里街七里街等處之賊斬馘百餘生擒僞朝將胡得才斬之是日由玉山城西北鳳皇山出隊亦斬悍賊百餘玉山

圍解其夜兩軍會合商定戰事并催戴奉聘尾追之軍前來合隊三十日卯刻劉明珍由右路螺絲山分三路進王德榜由十里山峽口分兩路進天明齊抵賊巢賊亦分枝拒敵其前隊賊數千皆擎洋槍搦戰勢頗兇悍鏖戰兩時王德榜劉明珍督所部橫衝貫陣截賊數段賊勢不支紛向浮橋逃竄官軍馬隊追及橋忽中斷賊之墮河死者無數是戰兩軍共斃賊七八百名生擒二百餘名奪獲賊馬四十餘匹洋槍百餘杆旂械無數是夜賊竄沙溪距廣信府城五十里四月初一日卯刻劉明珍等拔隊急追已刻到沙溪王德榜已由南岸前進適北岸有賊擄船筏過渡將襲其後遊擊賴長張成元等列隊下流扼之劉明珍率隊從上游躡淺奮擊

賊之中槍落水者無數奪獲船二隻竹筏十餘架賊復從沙溪衝出劉明珍擊卻之斃賊百餘名而還是日王德榜已馳抵廣信府城戴奉聘所部三營亦可繼至賊之大股尙屯沙溪其前隊距廣信二十里該軍旣到在賊先府城當可無慮臣前以入江西之軍不滿六千恐眾寡不敵飛令記名提督劉清亮率所部馬步入營接防馬金令王開琳率所部老湘入營旂急進玉山以壯後路聲勢劉清亮行至華埠聞賊已至玉山擬卽赴江西會剿臣以兩軍人數相當應畱一駐華埠以防由常州續至之賊劉清亮旣先到華埠應卽令其先往而畱王開琳暫駐華埠以期慎密大約劉清亮一軍初三日可以到玉山初四日可以抵沙溪此浙軍自昌化

截剿後復截剿徽境小川楊村之賊截剿馬金之賊截剿華埠之賊截剿玉山沙溪之賊見在迎頭截尾連獲勝仗之實在情形也計此次沿途截剿大小十餘戰合共斃賊萬餘拔出難民以二三萬計而官軍之傷亡者亦已數百此股爲陳炳文汪海洋及僞利王僞戴王僞來王諸逆其中亦有李世賢之黨僞稱四王田王者人數號稱十數萬其李世賢一大股已由歙休地界竄婺源入江西未嘗闌入浙境也其由常州城外竄來之僞烈王林彩新一股人數約二三萬四月初二日至昌化之白牛橋康國器由分水縣蘇車埠過河擊之賊見官軍忽至卽潰走斃賊千餘生擒百餘餘皆由甯國縣竄去中途逃散者多大約亦將由績歙覓路而竄江

西^臣已飭黃少春戒備以待聞後股尙有數起賊至故漶遂未可

解嚴^臣當預爲布置隨時相機辦理所有此次截剿最爲出力之

畱浙補用副將振勇巴圖魯劉明珍儘先副將戴奉聘均請

賞加總兵銜副將銜畱浙補用參將張介和請以副將仍畱浙江
儘先補用遊擊銜都司黃元吉請以遊擊畱於浙江儘先補用并
加參將銜以示激勵其力戰陣亡之參將銜儘先補用遊擊廖渭
臣副將銜參將黃應春參將銜遊擊彭光祥陳升倫都司劉開賢
張禮宣劉宗聖均請

敕部照例議卹以慰忠魂所有各戰實在情形謹由驛馳奏伏乞
皇上聖鑒訓示施行謹 奏

同治三年四月二十三日內閣奉

上諭左宗棠奏截剿上游竄賊連獲大勝一摺江浙敗賊竄入徽境經左宗棠督飭王開琳等軍連日在楊村屯溪鎮等處分途兜剿疊有斬擒逆匪復趨遂安縣屬馬金街圍撲黃元吉營盤并經黃少春等軍分路環擊殲賊無算重圍立解餘賊在馬金街對河築壘官軍乘夜擊破分隊躡追劉明珍遇賊於屏風關外擊斃悍賊多名三月二十九等日乘勝追至江西玉山縣境直逼城河溺斃賊匪無數王德榜一軍由城西北鳳皇山夾擊亦斬悍賊百餘名玉山之圍立解劉明珍等復分三路進剿齊抵賊巢該逆分隊迎拒王德榜劉明珍督軍橫衝入陣截賊數段逆勢不支紛向浮

橋潰竄墜河溺斃者甚多官軍復追及賊於沙溪由上下游躡擊斃賊百餘名勦辦尙爲奮勉著左宗棠迅卽乘勝督飭各軍將沙溪屯賊悉數殲除毋任竄逸所有此次尤爲出力之副將劉明珍戴奉聘均著賞加總兵銜參將張介和著以副將仍畱浙江儘先補用都司黃元吉著以遊擊畱於浙江儘先補用并賞加參將銜其力戰陣亡之參將銜儘先遊擊廖渭臣副將銜參將黃應春參將銜遊擊彭光祥陳升倫都司劉開賢張禮宣劉宗聖均著交部照例議卹欽此